

04/09/2001

Imbuan besar nanti atlit cemerlang

Hussain Said

SEKURANG-KURANGNYA sebanyak RM600,000 perlu dikeluarkan Majlis Sukan Negara (MSN) di bawah Skim Hadiah Kemenangan Sukan (Shakam) jika atlit kebangsaan berjaya memenangi 80 pingat emas, sebagaimana disasarkan pada Sukan Sea XXI, bermula Sabtu ini.

Jumlah itu adalah insentif terbesar dalam sejarah temasya dwitahunan yang diperuntukkan selepas badan induk itu membayar RM402,496 kepada 107 atlit yang melakar kegemilangan dengan membawa pulang 57 emas di Brunei, dua tahun lalu.

Berdasarkan skim itu, atlit individu atau dianggotai tidak lebih lima orang akan menerima insentif sebanyak RM5,000 sekiranya memenangi emas dan tambahan RM1,000 seandainya berjaya memecahkan rekod temasya.

Bagi atlit berpasukan yang melebihi lima orang, masing-masing akan menerima RM1,000 seorang jika memenangi emas.

Namun, tiada sebarang ganjaran diberikan kepada atlit individu dan berpasukan yang meraih perak atau gangsa.

Pengarah Persediaan Antarabangsa MSN, Ahmad Shapawi Ismail, berkata di bawah skim itu, jurulatih turut mendapat insentif RM1,000 sekiranya anak didik masing-masing menggondol emas.

"Persatuan sukan kebangsaan pula akan mendapat RM500 bagi setiap emas yang dimenangi atlit masing-masing. Sekiranya atlit mereka menyumbang 10 emas bermakna persatuan itu mendapat RM5,000," katanya ketika ditemui di hotel penginapan rasmi kontinjen negara di The Legend semalam.

Menurut Ahmad Shapawi, yang juga Timbalan Chef de Mission Malaysia, jumlah RM600,000 itu adalah anggaran yang perlu dikeluarkan pihaknya untuk diberikan kepada atlit, jurulatih dan persatuan sukan kebangsaan.

"Kita yakin sasaran 80 emas itu mampu dicapai berdasarkan persiapan rapi atlit di bawah program Gemilang 2001 serta kelebihan beraksi di gelanggang sendiri kali ini," katanya.

Sementara itu, Shapawi berkata Perdana Menteri, Datuk Seri Dr Mahathir Mohamad akan menyampaikan amanat dan menyerahkan Jalur Gemilang kepada kontinjen negara hari ini.

"Kita harap kesudian Perdana Menteri itu mampu mencetuskan dorongan dan rangsangan tambahan kepada atlit menjelang temasya itu," katanya.

(END)